




張大司馬奏稿卷二

起咸豐三年癸丑正月訖二月

目錄

勦辦徽義堂土匪竣事摺

遵旨催調兵將前赴大營片

恭報接篆日期籌辦撫綏防勦事宜摺

請調江守赴鄂差遣片

兵勇追賊請由各省糧臺就近截餉支應摺

請畱革員赴鄂差遣片

已革督臣遵旨派員解交刑部片

馳抵湖北省城見擬辦理情形摺

委員署理司道府縣篆務片

安徽省城失守請簡放大員并催滿兵改道馳赴江南摺

籌備船礮前赴大營片

辦理收復撫卹事宜摺

淮鹽阻滯請借銷川引片

請調前任藩司唐樹義貴州黎平府知府胡林翼來楚差遣片

委員署理糧鹽二道并廳縣各篆務片

瀝陳辦理支絀情形摺

湖南勦辦土匪情形片

江臬司未能速赴江南大營片

弘治司馬奏和卷二 目錄

勦辦徵義堂土匪竣事摺

咸豐三年正月十一日

奏爲勦辦瀏陽土匪竣事地方一律肅清見在委員審辦并查緝要犯恭摺奏

聞仰祈

聖鑒事竊照瀏陽縣下東鄉匪徒周國虞等設立徵義堂名目意

圖勾結

臣於奉到

廷寄後卽密飭陝西候補知府江忠源於勦辦巴陵土匪晏仲武同師之便由平江間道馳抵瀏陽相機勦辦所有十二月十八日匪黨分撲縣城營盤當經該守督勇痛勦大獲勝仗各緣由曾於十二月二十二日馳奏在案該匪被創之後回巢查點人數除陣

斬外逃散八百餘名疑均被我兵所殺又賊中著名拳棒教師張大被我兵擒斬各匪首震懾異常其脅從居民及有心從亂而未發者尙不下一萬餘人於十九二十二等日匍匐來營哀乞良民印帖求進兵時免其勦辦者前後已有三千五百餘戶均查明按戶取結諭令各安生業江忠源察知黨羽解散賊勢已孤卽於二十一夜三更拔營進逼賊巢分遣委員候選知縣伍煒揀選知縣趙瀚帶勇五百名進扼溪岡候選訓導文鴻盛貴州縣丞汪筠帶勇五百名進扼長泥嶺以防匪徒竄撲縣城之路江忠源率領拔貢劉長佑候選從九江忠濟文童楊承義蕭良植暨千總李輔朝等帶勇一千名於二十三日辰刻進扼古港

臣飛咨總兵經

文岱帶兵嚴堵北路十八盤諸險防其翻山竄逸之路該匪共六股周國虞陳朝涇陳德昭三股分踞三平洞朱興祥曾世珍鄧萬發三股分踞山口是夜四更江忠源帶勇進逼山口該匪鄧萬發曾世珍心慌膽落四散逃走本地團練將該匪巢穴焚燬并起獲大礮三尊軍械五十餘件江忠源督勇協同團練緝獲要犯陳國材等一百三十餘名并搜獲匪首朱興祥就地斬首示眾二十五日搜捕山口餘匪守駐三平洞南口并分遣李輔朝等帶勇繞道行一百二十餘里至平江縣界十八盤地方從三平洞北口進攻該處山勢險峻盤互四十餘里林深箐密人迹罕到李輔朝等於二十六日辰刻由北路進攻該匪聚集上平洞結寨固守李輔朝

卽督勇直撲賊柵該匪出柵拒敵眾勇向前槍斃賊匪數十名江忠濟帶勇繞出賊後縱火焚柵該匪四散逃匿李輔朝江忠濟分路追剿斃賊數十名生擒六十餘名墜崖落澗者不計其數奪獲大礮三尊擡槍鳥槍二百餘件子藥十數桶二十七日拔營至中平洞該匪聚集周氏宗祠羣出拒捕李輔朝奮勇爭先眾勇一齊赶上槍礮并施立斃賊匪十餘名該匪紛紛逃走追殺二十餘里生擒五十餘名起獲硝磺十石匪首陳朝涇陳德昭等帶領二十餘人從北面翻山竄逸至黃泥界地方經團練登時拏獲就近解送經文岱營內李輔朝等二十八日拔營至下平洞伍煒等亦從南口魚貫入隘合力搜捕先後共緝獲八十餘名二十九日復分

往大溪山光兩洞獲匪十餘名三十日復帶勇往寶蓋洞搜獲匪
徒二十餘名統計是役自十八日接仗起至三十日止先後生擒
暨各鄉團網送共獲匪徒六百七十餘名臨陣斬首暨鄉團格殺
共計七百餘名先後發給良民印帖解散脅從至四千三百餘戶
人數約一萬餘名起獲大礮六尊擡槍鳥槍二百餘杆長矛三百
餘杆檔杷檔牌共六十餘件腰刀一百數十把皮甲二十餘具硝
磺子藥數十石凡徵義堂匪黨嘯聚巢穴無不深入窮搜地方一
律肅清良民安堵如故已獲解省各犯俱經臣審明正法分別梟
示其未經解省各犯尙有四百餘名臣因人數過多卽委補用知
府夏廷樾選帶隨員馳赴瀏陽縣迅速審辦其情罪重大各犯卽

就地正法梟首示眾以昭炯戒容俟彙齊開單進呈

御覽其周國虞曾世珍鄧萬發三犯見懸賞格查拏據犯供曾世珍於十八日被官兵長矛戳傷甚重未知存亡該匪等稔惡已久地方居民受其荼毒誓必追蹤緝獻臣於辦理此事之始慮其山徑叢雜易致遠颺會飛札附近各州縣及江西袁州府萬載萍鄉等縣懸示賞格一體嚴拏務獲見據平江縣知縣林源恩督率鄉團拏獲要犯周禮等十餘名署善化縣知縣王葆生拏獲周大九等數名諒茲么麼小醜無難悉數弋獲臣見諄飭委員及地方官上緊查拏毋得以臣卸任在即稍存鬆懈臣於十一日拜摺後即馳赴岳州督辦防剿接印後察看情形或須移營前進或須移駐

要地容俟另摺具奏至此案匪徒人數眾多陰蓄異志已久迫近省垣時虞意外又其中良莠不一礙難辦理臣受事之始屢據該縣士民控告臣佯置不理密飭江忠源相機妥辦剿撫互施適欽奉

廷寄臣亦未敢宣露幸荷

慈諭遙頒密授機宜得以迅速蕺事該縣士民於江忠源接仗獲勝之後爭以牛酒犒師爆竹之聲數里不絕并哭訴年來受匪徒淫殺之慘耳不忍聞見飭妥爲安撫均各欣忭如獲再生雖首犯尙未全數就擒然頭目之擒斬網獻者已及十分之七八見在各鄉團尙日有擒獻匪黨解散淨盡器械糧食均已搜獲無存察看

情形斷可不至爲患在事出力員弁紳民可否仰懇

天恩俯准保奏前摺已經聲明伏候

諭旨敬謹遵辦所有勦辦瀏陽土匪竣事委員審辦查緝要犯并
微臣起程赴岳日期理合由驛恭摺奏報伏乞

皇上聖鑒訓示施行謹 奏

硃批另有旨欽此

咸豐三年正月二十日內閣奉

上諭張亮基奏勦辦土匪事竣一摺湖南瀏陽縣匪徒周國虞等
設立徵義堂名目勾結多人膽敢分撲縣城營盤經陝西候補知
府江忠源於上年十二月十八日痛加勦洗將脅從之民先行解

散江忠源一面飛咨總兵經文岱帶兵嚴堵北路十八盤險隘一面率帶文武紳士督勇協同團練將匪巢焚燬緝獲要犯陳國材并搜獲匪首朱興祥等就地正法復經團練拏獲匪首陳朝涇陳德昭等解送到營統計十八日至三十日止疊次生擒暨各鄉團細送共獲匪徒六百七十餘名臨陣殲斃及鄉團格殺共七百餘名先後發給印帖解散脅從四千三百餘戶奪獲軍器火藥甚多地方一律肅清良民安堵辦理尙爲妥速所有獲解各犯除業經正法梟示外餘著迅速審辦在逃之周國虞曾世珍鄧萬發三犯仍著嚴拏勿任稽誅勦辦此案之出力文武員弁紳民均著准其酌量保奏候朕施恩用昭激勸欽此

遵 旨催調兵將前赴大營片

咸豐三年正月十一日

再臣於本月初七日承准軍機大臣字寄奉

上諭據向榮奏籌備堵剿情形據稱逆匪攻陷武昌仍於漢陽漢口搭有浮橋必須多備礮船將浮橋焚燬方可進剿前刑部郎中盧應翔所帶礮船曾在長沙靳家河擊賊見在停泊何所總兵音德布在常德設防遊擊韓世禧分防長沙該處距賊較遠著張亮基潘鐸飭令音德布韓世禧於常德長沙多雇船隻率領前帶官兵前進韓世禧所帶湖南兵僅數百名著飭令於長沙防城內再挑數百湊足千名以資調遣副將鄧紹良所帶兵勇卽於岳州一帶多雇船隻并於洞庭湖招募水摸二三百名預備柴草硝磺等

物同虛應翔船隻迅速駛往以期合力進攻焚斷浮橋勦辦可以
得手斷不可稍有遷延致誤事機向榮既命爲欽差大臣一切調
度事有專責兵機貴速尤忌牽制張亮基平素辦事尙不迂緩今
與向榮共事一方必須和衷共濟諒不以前在雲南曾有會同參
劾向榮之奏稍存意見也欽此臣跪誦之下感悚難名竊粵逆竄
踞武漢橫江搭造浮橋以便往來策應浮橋不斷誠恐此攻彼竄
終難得手臣前接准幫辦軍務提督向榮移咨卽已飛飭盧應翔
將所帶礮船駕駛前往總兵音德布參將韋中魁前經奏調管帶
滇兵來楚卽在常德設防嗣因澧州兵單經臣等札飭韋中魁移
駐澧州雲貴總督臣羅繞典路過澧州時將韋中魁帶赴襄陽并